

FIESTAS DE SAN LORENZO 2004 PREGÓN

¡Buenas noches a toz!

Eszelentísimos presidentes y consejeros comarcals, alcaldes, conzejals, estadillanos y chen d'afuera.

Esta noche, están chuntos en esta querida Pllaza Mayó, asperán con ilusión, qu'encomenzen las fiestas de San Lorenzo; ixe mereciu regalo que cada año mos fen los estadillanos.

Me siento falaguera per sé yo l'eslegida pa tení l'honor de desembolicalo con este pregón .¡ Gracias!

En las enciclopedias dizen qu'estadillano é el qu'ha naziu u vive en Estadilla.¡Y, aquí se quedan!

Ixo, pa los estraños ya'stá ben. Pero, nusatros sabén que sé estadillano é mucho más.

Yo, atrivida esta noche, añadiría que ... estadillano é el que **siente** a Estadilla. Y en ixe sentí dentra el conozela, el querela, l'añorala, el cuidala, y l'enargullezese d'ella.

Asinas, per sentí yo tó ixo como los d'aquí, puedo dí qu'unque viva afuera, soy estadillana. Y como estadillana, me derijo a vusatros esta noche.

A Estadilla se la puede conozé de golpe u a poqué a poqué como lo va fé yo, perque va tení la suerte de que me tocasse nazé en este pueblo. Y, é l'entrañable calle'l Romeu la que me retray los recuerdos más viejos, chugán con los mios primeros amigos y amigas y acompañaus d'una chen sencilla que, con pazénzia, mos contaba historias.

Y mientras m'iba fen gran, tamé iba fénsese gran el pueblo; anda qu'un dia ya me sabeba, como los demás, los nombres de todas las casas y quí viviba 'ndentro.

Pero, pa conozelo tó ben, lo milló era que te repllegase una cuadrilleta perque asinas, cuan mos picaba la forniguilla de corré aventuras, mos atriviban a í más lejos.

Pa yo, que va sé entonzes, cuan, sin dame güaire cuenta, va comenzá a 'nganchásese, pa siempre, este llugá on, cada rincón tiene una mágia espezial.

Y es que, las cosas d'aquí, los colós, los ruidos, los silencios...van entrante a poqué a poqué, per toz los sentidos, se mezcllan y te'mpapan de sensazions tan güenas que, de golpe, te trobas dan grazias a Dios per viví y per lo bonico qu'ha feito este rinconé del mundo.

Una miqueta d'ixa màgia la podén veyé en el llibro de Xavier Bayle "ESTADILLA, MEMORIAL DE LUZ".

Tornan a aquellas añadas, las Fiestas de San Lorenzo eran siempre una güena ocasión pa que los crios conozesen chen y compartisen emociones.

Muchos de los qu'estaz aquí ne van viví unas cuantas chuntos. Porque, ... ¿tos acordaz...

...de la nuestra sospresa la víspra pel maitino, al veyé de golpe, la valla'l baile ben esplatera en medio'l Portal? (¿qué mos sabeban nusatros de la noche de trajín de los mozos, pa montala!).

y... ¿l'obedénzia y la pazénzia que prezisaban pa aguantá quietos y sin dí ni piu, aquellas obligadas siestas, cuan to'l pueblo se paraba?.

Y al rato,... ¿l'agradecimiento que sentibas per ixe güen amigo que gritán el tuyo nombre desde'l patio, te veniba a buscá?

y...¿ la basemia de dentrá'l baile pa sé grans... sin sabé que se mos quedaría afuera lo más inozente de nusatros?

y...¿ la tristó, más que talcual, que mos cogeba l'último dia?

¡ Quemesió cuánto mos duraba'l está mustios!

Pero, años aván me'n va í del pueblo como muchos de vusatros y entonzes, va sabé cómo siente uno a Estadilla desde llejos; anque el privilegio d'habeme casau con un estadillano, va fé más llevadera la mía'ñoranza sén qu'en casa nuestra van mantení las costumbres y l'habllá d'aquí.

Solo los que vivín afuera, sabén cuánto se troba a faltá tó esto; ya sea el simple caminá per una calle u la gustosa xarradeta y, ¡lo qu'agradecén las notizias, cuan mos llegan?... Ninguno ha'spresau de manera tan cllara ixe sentí del d'afuera, como el siño Cleto José Torrodellas, (Pablo Recio) en el suyo llibro HORAS SUELTAS.

Que los estadillanos están argullosos de Estadilla, no lo podén negá. Se mos nota en cuanto habllán d'ella.

El nuestro argullo é un argullo no pas solo pel pueblo mesmo, tamé per la suya chen, per la suya historia y per tantos personajes ilustres que, nazius aquí, han siu puntals pa Estadilla u famosos pasadas las suyas fronteras.

Pero, é a **los otros** a qui yo querria rendí un homenaje esta noche.

Un homenaje de reconocimiento a toz los estadillanos y estadillanas desconozius, porque los suyos nombres no s'han escribiu may en los llibros, y qu'han luchau per este pueblo desde el principio de los tiempos hasta hoy. Desd'aquellos primeros poblados de fá 15.000 años qu'en la COVA ALONSÉ, allá per Chardiz, a lo milló, zelebrán chuntos bella caza'special, un dia de caló van inventá la primera fiesta.

Un homenaje a ixas personas senzillas y de güena fé que vivín en casas sin escudo, han dixáu aquí la suya sudó treballán per este pueblo. Que l'han queriu como lo querén nusatros y qu'han cudiau las suyas costumbres, las suyas creyenzias y la suya llengua hasta conseguí l'Estadilla qu'hoy disfrután nusatros.

Nusatros, los zagueros en recogé'l relevo y los responsables de forjá ben l'argolla más nueva d'ixa llarga cadena, de chen noble, que mos estira (como diba'l siño Cleto)

Los qu'están aquí sabén qu'ixa faena hoy, no la tenín brencia fázil porque mos ha tocau viví en unos tiempos de prisas y de cambio continuo. Una cheneración qu'hen pasau, casi sin damos cuenta, de los bajos a los trautós con aire acondicionau y arradio; del fogaril a la vitrozerámica; del brasero y la tombilla a la calefacción y de tantas a tantas cosas que, ben podrian dí, que están ya vacnaus pa que no mos espante nada.

Pero tó y con ixo, podén está güecos porque se'y vey qu'el pueblo tira'n t'aván y cada año que pasa, millora algo. U si nó, mos mirán per encima encima lo último y verén que...

... s' han presentau llibros nuevos : dos edicions sobre la vida del estadillano Iñigo Abbad y Lasierra, feitas per los historiadós Juan José Nieto y José M^a Sánchez y fa pocos dias, l' entrañable llibro de retratos “ ASI FUIMOS ASI VIVIMOS ” de Mariano Badia .

... s'ha inagurau l'espazio cultural Buñero, en l'edificio multiusos del Portal del Sol, como una millora pa la vida social del pueblo y de los que viengan a velo.

Tamé ha siu este año, cuan s'ha zelebrau, per primera vez aquí, el Dia de la Comarca; llegánse a repartí comida pa más de mil personas. ¡Tó un éxito! Y es que...¡ mos gusta que vienga chen!

Por eso, a los forasteros que estáis aquí os digo que, apenas os reconoceréis por ese calificativo; porque sois recibidos con los brazos abiertos por una gente, orgullosa de todo lo suyo y generosa por naturaleza, que disfrutará al compartirlo con vosotros. Veréis que os será difícil haber convivido con nosotros, y no dejáros un trocito de vuestro corazón en este pueblo. ¡Podréis comprobarlo en estas fiestas!

Unas fiestas, qu'ojeau el programa, se presentan muy completas (sin dixà de lau los dias de rodaje qu'hen viviu esta semana).

Agradezcán a los organizadós l'esfuerzo qu'han feito pa preparalas. Perque, ñabrá atos religiosos pa rendí culto al nuestro patrón San Lorenzo y atos recreatius eslegius pa que toz mos lo pasén ben.

Los más grans d'entre nusatros van recibí ayer un mereciu homenaje en el Güerto'l Barón.

Los más chicoz tendrán estos dias, momentos de cucañas y criaturadas pa'stá distraius.

Los de la segunda edá, seguntes mos parezca, triarén ... fé u mirá; bailá u escuchá, charrá u paseá pa trobamos los d'afuera con los del pueblo y mos saludarén, y mos esplicarén lo nuevo d'unos a otros. Anque, sin queré, relojarén disimulaus buscán a los nuestros chovenastros y preguntanmos mitá curiosos, mitá protetós encara...¿on estarán?¿con qui irán?¿qué farán?...

Pero vusatros, mozez y mozetas, que trafegaz barucosos desde fa dias preparán el poncho, tos estimarez está, justo on no'stén nusatros, (como manda l'edá) y farez la vuestra fiesta en los guariches, y con chilos y risas frescas per to'l pueblo, a tó hora demostrarez lo ben que tos lo pasaz.

De vez en cuando, mos sentirez a los grans espotriquiá pel barullo que montaz, per tantas camas vacias de noche y llenas de dia, per la falta de gana con cazuelas tan rebutientes de comida, per ...

Y vusatros, sacarez excusas pa tó . Y nusatros, mos las creyerén.

U... farén veyé que mos las creyén.Y es que tó ixo... ya fa tiempo que mos lo conozén de sobras.

Asinas que, no tos estrañe guaire si tos digo que en ixo rondiná nuestro, ñay bel poqué de'nvidieta perque, a ratos, añorán aquellas fiestas cuan a nusatros, como ahora a vusatros, tamé mos bulliba la sangre.

Acabau aquí el pregón y desembolicau ya'l regalo, au a'mpezá a disfrutalo escuchán las jotas que mos encenderán la nuestra flama aragonesa.

¡¡¡ En t'aván Fiestas de San Lorenzo 2.004 !!! Y...¡ que sean felizes pa toz!

* * *

Estadilla, 6 d'Agosto del 2.004

Amelia Cequier